

## **Nuummi Najukkami Ataatsimiititaliap ilaasortaanik akuersineq**

Aalajangiiffigisassaq

J. nr.:00 00 00-A30-2-18

Suliffeqarfimmut Kiffartuussivik - kommunaldirektøri Lars Møller-Sørensen / LMS

### **Suliassamik eqikkaaneq**

Nuummi Najukkami Ataatsimiititaliortoqarnissaa aggustip 28-ianni 2018 Kommunalbestyrelsimit akuersissutigineqarpoq. Aamma 2018-imut aningaasaliissuteqartoqarnissaa Kommunalbestyrelsip akuersissutigaa (oktobari-decembari).

Ataasinngorneq 17. septembari 2018 Katuami innuttaasunit qinersinikkut najukkami ataatsimiititaliamut ilaasortat qulit qinerneqarput.

Malittarisassat naapertorlugu Najukkami Ataatsimiititaliami ilaasortat nutaat sinniisussallu akuersissutigisassanngorlugit saqqummiunneqarput.

Aningaasaqarnermut Inuussutissarsiornermullu Ataatsimiititap 2018-imi augustarip ulluisa 14-ianni ataatsimiinnermini suliaq akuersissutigivaa Kommunalbestyrelsimullu inaarutaasumik akuersissutigisassanngorlugit ingerlatseqqillugu.

### **Inassuteqaat**

Suliffeqarfimmut Kiffartuussiviup Aningaasaqarnermut Inuussutissarsiornermullu Ataatsimiititamut inassuteqaatigaa:

- Suliaq Kommunalbestyrelsimit inaarutaasumik akuersissutigineqassasoq naleq. ilanngussaq 3.

### **Suliassamik saqqummiussineq**

Kommunit aqunneqarnerat pillugu Inatsisartut inatsisaat nr. 29, 17. november 2017-imeersoq naapertorlugu Nuummi najukkamik ataatsimiititaliamik pilersitsisoqassaaq.

Oqartussaaqataanerup annertusarneqarnissaa taavalu innuttaasut kommunimilu qinikkat oqartussallu akornanni najukkami attuumassuteqartunik apeqqutinut tunngatillugu ammasumik oqaloqatigiittoqarnissaa najukkami ataatsimiititaliap siunertarivaa.

Nuummi Najukkami Ataatsimiititaliortoqarnissaa aggustip 28-ianni 2018 Kommunalbestyrelsimit akuersissutigineqarpoq. Aamma 2018-imut aningaasaliissuteqartoqarnissaa Kommunalbestyrelsip akuersissutigaa 2018 (oktobari-decembari).

Ataasinngorneq 17. septembari 2018 Katuami innuttaasunit qinersinikkut najukkami ataatsimiititaliamut ilaasortat qulit qinerneqarput. Qinigassanngortittut ukiunut pingasunut qinerneqarput, 2018-imilu oktobarip qiteqqunneraniit najukkami ataatsimiititaliami suliassat aallartissavaat.

Aningaasaqarnermut Inuussutissarsiornermullu Ataatsimiititap ulloq 19. septembarimi ataatsimiinnerani najukkami ataatsimiititaliami ilaasortat nutaat sinniisuilu saqqummiunneqassapput.

### ***Aaqqiissutissatut siunnersuut – suliatigut naliliineq***

#### **Najukkami Ataatsimiititaliami ilaasortanik qinersineq**

Ulloq 17. septembarimi qinersineq ileqqoreqqusami § 4, imm. 3-mi qinersinermut periuseq naapertorlugu ingerlanneqarpoq. Qinersineq innuttaasunik ataatsimiititsinermi pivoq, tassanilu takkuttut tamarmik, 16-inik ukioqalereersut, illoqarfiimmi aalajangersimasumik najugallit,

qinersisinnaatitaapput. Innuttaasut tamarmik immikkut qinigassanngortittut marluk qinernissaannut marloriarlutik qinersitinneqassapput. Taasineq, allakkatigut, isertortumik ingerlanneqarpoq.

§ 4, imm. 10 naapertorlugu qinigassanngortittut najukkami ataatsimiititaliami ilaasortatut Aningaasaqarnermut Inuussutissarsiornermullu Ataatsimiititamut aamma kommunalbestyrelsimut inassutigineqartut, taasinerit amerlassusii aamma illoqarfiup immikkoortortaani Nuussuarmi, Qinnqutsinni Nuummilu illoqarfiup qeqqani najugaat naapertorlugit toqqarneqarput. Illoqarfiup immikkoortuineersut immikkut marluk amerlanernik qinerneqarpata, najukkami ataatsimiititaliamut arfinillit ilaasortassatut qinerneqaaqqaassapput. Ilaasortanngortussat sisamat qinigassanngortittut sinnerisa akornanni qinerneqarnerpaajusut toqqarneqassapput. Illoqarfiup immikkoortuinit tamanit immikkut marluk iluatsinngippata, qinigassanngortittut akornanni taaneqarnerpaat toqqarneqassapput.

#### Aningaasaliissutinik aqutsineq atuinerlu

Kommuneqarfik Sermersuumi najukkami ataatsimiititaliat malittarisassaanni § 2, imm. 3 naapertorlugu, najukkami ataatsimiititalianut ukiumoortumik aningaasaliissutit atorneqartarnissaannut akisussaaffik Kommunalbestyrelsimut ataatsimiititalianut tunniunneqarpoq. Taamaattorli Najukkami Ataatsimiititaliap ataqatigiissarnerata immikkut aqqissuunera siunertaanut pitsaassusaanullu qulakkeerneaqqaassaaq taavalu ukiup siulia naatinnagu Aningaasaqarnermut Inuussutissarsiornermullu Ataatsimiititamit akuersissutigineqaaqqaartussaalluni.

Najukkani inuiaqatigiit taakkulu sumiiffii, kulturikkut oqartussaaqataanikkullu periarfissaat attatiinnarumallugit ineriartortikkumallugillu sulinermi aningaasaliissutit atorneqarnissaat sumiiffinni innuttaasut, peqatigiiffiit, kommunimi qinikkat oqartussallu suleqatigiinnerisigut pissaaq.

Piffissaaleqineq pissutigalugu Najukkami Ataatsimiititaliap 2018-imi aningaasanik atuinnaanut tunngasoq Aningaasaqarnermut Inuussutissarsiornermullu Ataatsimiititamit akuersissutigineqarsinnaanngilaq. Taamaattumik Suliffeqarfimmut Kiffartuussiviup allaffeqarfimmut/Qinikkanut Allatseqarfimmut 2018-imut aningaasaliissutinik, najoqqutassat iluanniippata, atuisinnaanermut piginnaatitsissummik akuersissuteqarnissaq innersuussutigaa.

#### Aningaasaqarnikkut sulisoqarnikkullu naliliinerit

Nuummi najukkami ataatsimiititaliaq 2018-imi oktobarimi inissitsiternissaa naatsorsuutigineqarpoq, taamaattumillu najukkamut ataatsimiititaliamut 2018-imi qaammatini pingasuni (oktobarimiit decembarimut) 1.125.000 koruuninik aningaasartuuteqartoqassaaq.

Ukiumoortumik aningaasartuutaasartussat 4.225.000 koruunit 2019-imut missingersuusiornissamut ilaatinneqassapput.

#### Inatsisitigut tunngavissaq allakkallu tunngaviusumik uppersaatitalit

Kommunit aqunneqarnerat pillugu Inatsisartut inatsisaat nr. 29, 17. november 2017-imeersumi kapitali 4, § 32.

Kommuneqarfik Sermersuumi najukkani ataatsimiititaliat pillugit ileqqoreqqusat  
Kommuneqarfik Sermersuumi najukkani ataatsimiititaliat suleriaasiat

#### Ingerlariaqqinnissaq

Najukkami Ataatsimiititaliaq 2018-imi oktobarip qiteqqunnerani inissitsiterluni ataatsimiissaaq, tassa ilaasortat qulit kommunalbestyrelsimut akuerineqarneraniit kingusinnerpaamik ullut 21-t qaangiutsinnagit.

Ileqqoreqqusat, suleriaaseq kiisalu suliat qanoq suliarineqartarneri pillugit ilaasortanut nutaanut saqqummiunneqassapput.

#### **Aningaasaqarnermut Allatseqarfimmit oqaaseqaatit**

Aningaasaqarnermut Allatseqarfimmit oqaaseqaatinik pissarsiniartoqanngilaq, tassani 2018-imut aningaasaliissutit akuersissutigineqareermata, 2019-imullu aningaasaliissutissat 2019-imut missingersuutissatut siunnersuutitut ilaatinneqassapput.

### **Siusinnerusukkut aalajangerneq**

*Aningaasaqarnermut Inuussutissarsiornermullu Ataatsimiititap aalajangernera 19. septembari 2018-imeersoq:*

Inassuteqaatit akuersissutigineqarput.

### **Innuttaasunik peqataatsineq/attaveqaqatigiinneq**

Nuummi Najukkami Ataatsimiititaliamut qinersinissaq kommunip nittartagaatigut, Facebookikkut, radiukkut aallakaatitassiatigut, allagartalersuinikkut, ilinniarfeqarfinnut, siulersuisunut, peqatigiiffinnut illoqarfimmilu inuussutissarsiortunut allakkatigut attaveqarnikkut nalunaarutigineqarpoq. Tassunga atatillugu innuttaasunut paasisutissiilluni ataatsimiisitsisoqarpoq kiisalu borgmesteri, kommunalbestyrelsimi ilaasortallu ilanngullutik qinersinissamik saqqummiussisimapput, ilaatigut allakkanik agguaassinikkut aammalu innuttaasut ataatsimiisinneqarnerannut peqataanikkut.

### **Ingerlatsivinnit allanit oqaaseqaatit**

Attuumassuteqanngilaq.

### **Ilanngussaq**

1. Kommuneqarfik Sermersuumi najukkani ataatsimiititaliat pillugit ileqqoreqqusat
2. Kommuneqarfik Sermersuumi najukkani ataatsimiititaliat suleriaasiat
3. Qinersisartut allassimaffiat/-inernerit (ataatsimiinnermini agguaanneqassapput)